



Congress-i army
operations ajak ashishir: PM

Bayern aser Ulreich na
tenangzüktepbayanglushi



Union Minister Dharmendra Pradhan-i Nagaland nung PM SHRI Schools 10 semzüksü

Dimapur, Chiteni/July 29 (TYO): National Education Policy 2020 amshi tenzüker küm pongu ajungba bilemteta tanü New Delhi nung Union Education Minister Dharmendra Pradhan-i Akhil Bharatiya Shiksha Samagam 2025 semzüksüba mapang virtual yimya ajanga Nagaland nung PM SHRI Schools ter semzüksü aser hostels 23 atema nüngshilong azüngja liasü.

Pai Dharti Aaba Janjatiya Gram Utkarsh Abhiyan (DAJGUA) kübok PM SHRI school tem senzükja hostels atema nüngshilong azüngtsüba ya education aser tribal welfare nung alizüng ana atongba temaitsü alitsü. Sentong tasen, campus semzüksüba aser nüngshilong azüngtsüba densema sen 4,000 crore dak tema indang project tem sayatsü.

Nagaland nung government schools 49 nungi shimteta PM SHRI schools ter ya district shia nungi ka-ka lir, aser item ya NEP 2020 standards mapa kuma inyakba asoshi model schools ama agizük aser itemji PM SHRI GHSS Chümoukedima, PM SHRI GHSS Kiphire, PM SHRI GHS Kiruphema, PM

SHRI Mayagnokcha GHSS, PM SHRI GMS Mon Town A, PM SHRI GHS DC Colony Peren Town, PM SHRI GHS Phusachodu, PM SHRI GHSS Thangjam, PM SHRI GHS, Wokha Village aser PM SHRI GHS Nyengching alitsü.

Ministry of Education kübok Samagra Shiksha framework ajanga linük tesem balala nung hostels tasen 1,000 yanglutsü sentong lir, ta ashi.

Linük indang 14,500? school PM?SHRI initiative nung shilem ka ama, item schools ya centres of excellence ama asütsü, kong ki o jen tajungba aser NEP-i 'access, quality, equity aser inclusion' nung ranglokba curricula agütsütsü.

Iba sentong ya 'live stream' asü, koba Government Higher Secondary School, Mon 'C' nung kaketshir, tesayur aser District Administration ketdangsür temi repranga liasü.

Iba sülen EAC Mon, Er. Mhao-i kaketshirtem dang senso tajung ka-ka asütsü, lokti nung shilem tajung agitsü aser yimya tamajung mamshitsü ajungshia liasü.

Paisa kaketshirtem dang meranga azüngtsü aser results tajung bener aritsütsü ayongzüka liasü.

CM Rio-i ULBs tem dang tali saksalema inyaksangshitsü ayongzüker

Kohima, Chiteni/July 29 (TYO): Nagaland Chief Minister Dr. Neiphiu Rio-i Urban Local Bodies (ULBs) tem dang state nung alimar lendong timtem tali ajuruba mapang nisung aser ki o jen kumzüka ayutsü asoshi anir inyaksü ayongzüka liasü.

"Nenok ya administrators kisüng masü, nenok ya 'first line of defence' lir," ta Dr. Rio-i Kohima nung anogo asem atema Training on Urban and Local Resilience tenzüka mapang elected councillors aser ketdangsür den Mongulbarnü jembidang ashi.

Iba training ya Nagaland State Disaster Management Authority (NSDMA), Home Department ajanga United Nations Office for Disaster Risk Reduction (UNDRR), International Institute of Safety and Security Management (IISSM), aser state indang Urban Development aser Municipal Affairs Departments den lungjemer ayongzüka alitsü

Nagaland ya tematiba seismic zone V nung lir asünung, "Asenoki zübazülema malitsü,a kechiaser building permit nung nenoki (councillors) meyongnem

agütsüba ajanga takum kumzüksü aser nenok saksalemba ajanga nisungi yangluba lendong nungi jenbua alitsü," ta Dr. Rio-i ashi.

Chief Minister-i region nung alimar lendong mela-mela ajurutsüsa aliba indang lemsatepdang, talisa Dimapur aser Kohima tsüngta tanen makai alinen aluba aser lenmang majungba indang tuteta ashi.

"Ibai shidak agibo Trans-Asian Highway No. 1 asütsüba, saka iba ama tepetzük jenjang nung lir. Tzüngluruwa shia asen li tanük senzuka yutsüba yong timtem ajurur," ta pai sasaseta ashi.

Dr. Rio-i councillors aser municipal lenirtem dang building by-laws shidak amshitsü ayongzüka liasü.

Ayong anasa aser alinen aludak ozüng alema kisü-jensütsü khenyongi memelatsüla, anungji stop-work orders agütsütsüla aser lendong ajurutsü aliba ki o jen raksatsüla, ta pai ashi.

Pai geotechnical assessments makai permits magütsütsü ashi aser talisa NH-29 aser danga high-risk corridors nung ki o jen yagluba maparen metenzükdang ali tashi ait-mait tendangtsü ayongzüker.

Tawa Chümoukedima, Niuland aser Dimapur Market nung ajungben tzümetzüngadoka ki o jen metsüngbangba athishia, "Asen tarutsü tia yamai masütsüla," ta CM Dr. Rio-i ashi.

Kisama, Piphema aser Pherima nung alinen aluba ajanga nisung takum aser ki o jen samaba bilemteta jembidang, "Asenoki ayongkum anasa, menoknok anokba tesem aser ali tanük aliba telemok nung ki o jen yangluba ajanga asangsang jangjar. Ibaji melenshitsü mapangji tangya lir," ta pai ashi.

Meyi marudang sentong yanglua telangzüba agütsütsü asoshi ULBs temi District Disaster Management Authorities, Police, Fire services, PWD, Health department aser Public Health Engineering Department den teka amtepa alitsü nüngdaker, ta Chief Minister-i ashi.

Paisa district-level frameworks den lirumedema

pei alidak disaster management plans yanglutsü, disaster committees tenzüksü aser sandbags, water pumps, süki aser first-aid kits amala nüngdakba anepalua ayutsü ajungshia liasü.

Mapang shia kilentsü aoba lenmangtem repranga anepalutsü yimya akumtsüla. Meyi metenzükdang tangbanga aliba culverts tem lapoktsükla, yipru aйдang tsü a t s ü n g d e n b a yimdokdaksütsüla, jana-reja indoktsüla aser ali atsünga aruba soitba mapa mezüng inyaksüla aser retaining walls tashi mait aliba tashi itdaksütsüla aser teti tzü atsünga tesemtem jangjatsü kanga tongtipang lir, ta Nagaland CM-i ashi.

Tzünglu kanga sashia aruba mapang kilentzü aoba lenmang nokdanga tzü moteta adokba nungi kumzüksü asoshi jana bendena tim tesem nung indoktsü nüngdaker, ta pai ashi.

Infrastructure dak sendakba nung Dr. Rio-i municipal bodies tem dang lenmang, culvert aser apu amala tashi ita ali-mali reprangtsü aser tilateri yanglushitsü alibattem menongnangi inyaksü ayongzüker.

Maneni Department of Geology and Mining mesüra NSDMA den teka amteper alinen alutsüsa aliba tesemtem jangjateta boulder netting amala amshitsü ayongzüka liasü.

Rio-i ULBs tem dang nüburtem nem early warning signs, tzümetzüng nungi jenbua alitsü yimyattem, mürekmejutsü awareness agütsütsü aser jila ajunga nung emergency contact osang tejangja agütsütsü ajungmesoa liasü.

Jelia ali metendangi tenem nung aliba jila nung project magütsütsüla aser talisa geologically sensitive zones nung building permits ya ajaki amshitsüla, ta Chief Minister-i ashi.

"Nüburtem kumzüka ayutsü ya ajakdang tongtipangtiba lir," ta pai ashi.

"Nai kilentsü aoba lenmang ka lapokba ajanga dokan kibur ka takum kumzüker. Nai building laws amshidang, tanur ka tarutsü tia kumzüka yutsür," ta CM Rio-i councillors tem dang ashi.

Ajungben alimar lendong yagi ajak dak kongshir: Advisor Nyuthe

Kohima, Chiteni/July 29 (TYO): Nagaland State Disaster Management Authority (NSDMA), Home Department ajanga United Nations Office for Disaster Risk Reduction (UNDRR), International Institute of Safety and Security Management (IISSM), aser state indang Urban Development aser Municipal Affairs Departments den lungjemer Capital Convention Centre, Kohima nung Nagaland nungi elected Urban Local Bodies atema Urban and Local Resilience nung anogo ana training ayongzüka nung jembidang, state ya Seismic Zone-v nung lir, aser mapang shia menoknok anoker, alinen alur, tzümetzüng adoker, yipru aiter aser morok mi adoker, ta Advisor, NSDMA & NRE, Z. Nyusietho Nyuthe-i ashi.

"Ajungben alimar lendong yagi ajak dak kongshir... shinga jenbua mali. Anungji jenjang ajak nung saksalema aser

renema alitsüla," ta pai ashi.

Iba training nükjidong ya Municipal asem aser Town Councils 36 nungi tasen shima aliba ULB lenirtem asoshi disaster risk reduction (DRR) capacity angatetdaksütsü asoshi lir ta pai ashi.

Shisatsü tali prokshitsü atema local master trainers anitettsü asoshi special Training of Trainers (ToT) session ka agiogo, ta pai ashi.

Iba sentong ya alizüng tasen ka tongtetba lir, aser iba yagi Nagaland indang urban governance nung 'institutionalizing resilience' asoshi tongtipang mera ka agirm anungji shilem agirtemi shisa lemsateptsüla, ta Nyuthe-i ashi.

Kasa sentong nung Advisor, Municipal Affairs and Urban Development, Zhaleo Rio-i ULB lenirtem dang urban planning, disaster preparedness aser jana-reja ketdangsüba nung tasü ita inyaksü ayongzüker, aser alimar lendong

timtem mapang first responders ama renema alitsüla, ta ashi.

Office nung küm ka dak tema menaka, ULBs aikati tang tashi abensa renloka aoba mesayur, ta Advisor Zhaleo-i ashi.

Office ketdangsütsü, pei jila atema sentong yanglutsü aser action plans mapa kuma inyaksü angazüksü asoshi councillors nem sorkari küm ka mapang agüja lir, ta pai ashi.

"ULB kar danga mejanga lira, saksü mapang tongogo," ta pai tekumandangtsü ashi.

Tawa Dimapur aser Kohima nung tzümetzüngba ya tzünglu kanga sashia aruba agi kisüng masü saka kilentsü aoba lenmang junga maliba, jaka-reja junga anepalu masüba aser sentong meyanglui ki o jen yangerba ajanga lir, ta pai ashi.

Pai building by-laws shidak amshitsü, lendong aliba tesemtem jangjatettsü aser mapang shia nüburtem nem training agütsütsü nüngdaker ta ashi.

Tseminyu nung Best Farmers Award agütsü



Dimapur, Chiteni/July 29 (TYO): Best Farmers Award agütsüba sentong July 29 nü Phenwhenyu Village Council Hall nung agiogo. Iba sentong nung EAC Tseminyu, Mhathung Ngullie alakteta jaoker liasü.

Sentong nung o jembiba mapang Mhathung Ngullie-i ashiba agi, Tseminyu District ya North East Initiative Development Agency-i agizükba ajanga aluyimertem kanga temulung lemteta kümogo, sustainable aluyimba

yimya ka benoktsü asoshi ajungmesogo, koba ajanga kinük nung aliba tesemtem rongsenketzüng renlokdahtsüba den tzü mopung aser aremshiruru den süngtolitong liromedemasoshi teyari agütsüogo.

Tanü aluyimertem nem parnok mapa atema tetushi agütsüba ajanga aluyimertem maneni ajungmesotsü, rongsen tali aazüktsü atema maongka taliba nguteta aotsü asoshi teyari agütsütsü aser tarutsü nung libaliro jenjang tajungba

kümdaktsütsü, ta pai ashi.

Sentong nung Junior Soil Conservation Officer Tseminyu, Pelei Theunuo aser Chief Veterinary Officer, Dr. Kenalo Kath natia o tatsütsü jembia liasü. Sentong ya Senior Field Executive NEIDA, Daniel Kemp lenisüba nung agi, Phenwhenyu Village Council Chairman, Rushvulo Tep-i lokti pela agizükba o jembia aser Senior Field Executive NEIDA, Rache Wetsah-i tepela o jembia liasü.

Longsa nung Tsüngremmung benjong tulu ayonger

Mokokchung, 28th July (TYO): Government of Nagaland department of tourism-i yaria Longsa Mejensanger Putu Menden-i August 1-3, 2025 anogo asem nü Longsa yim dak Tsüngremmung benjong sentong tulu ka ayongzüka lir. Iba benjong asoshi putu yimsüsü anir senso nüburtem kanga mazüangi renemkonemdaki.

August ka Süngbenmung anepdang Longsa zünglepzüki shayangzü atentsü. Iba aonung sobaliba tetoktepbba sentonga ka akatsü, iba nungji - Wameshang ken (tetsür & tebur na prong), Ohoila ken (tetsürtem tsüngta) aser Miotsü mio tetoktepbatem akatsü aser iba sentong nung RD Ongpangkong South Block, BDO, L. Namchei Phom tetushi tesemdang asütsü jaoka lir.

August ana, Yatinü tongti tesemdang Nagaland PWD (R&B) Minister, G. Kaito Aye, tetushi tesemdang MLA & Advisor, Imkong L Imchen, tetushi tejaoker MLA & Advisor, Imkongmar parnoki anir Longsa Sangpu mepu nungi benjong amungdak Salang Lenden tashi yimkong yimdong süa Shayangzü (vine) atsür alua akhi tsürabur yimya nung arr atsüptetsü.

Iba sentong nung Ao

Senden tiria shilem agitsü lir. Longsa nung telok balala den ano kishikina Chare (Sangtam) aser Tichipami (Sumi) yim nungia yartsüsangertem shilem agitsü jaoka lir.

August asem nü Aien Lenpi dak sentakba maparen inyaka benjong tembangtsü sentong tajung renema lir. Covid-19 ajanga alima süngjemba toagi Longsa nung küm ishika Tsüngremmung benjong tulu memungteti aruogo, taküm yabo balaka amungtsü terenemshiba lir, anungji, senso nübur, anükabang, raliwalir aser tejangrar ajak benjongdaki pela shishia jaoker, ta Longsa yimdeni osang ka ajanga metetdaksü.

Longsa yim ya Mokokchung town nungi kilometer 30 shi pilar lir. Longsa ya rali-walir asoshi tongtibang yim ka asütsü ta sür nükla ngur Nagaland sarkari 2006 küm to "Tourist Village" sangdong. Longsa nung kümshi Tsüngremmung benjong metsünga reta amunger aser iba sentong reprangi liso nisungtem dang masü bendanglima nungia dena meta penzürttem arur.

Longsa yim dak otsütsü aketba tesem tatishitsü agi - Longkakak, Koralong, Longsalong, Ko Kongki, Awatsü tzüpu-tem lir. Iba den ano Yimpenzükong nung mitza

ka yanglua kar, yangji tangu satoka kazütsüsa mopung tanep aoner, aser yang nungjagi Longsa yim den temeket yimtsüng aser tanga district-tema temenungratsüka angur.

Asen Aori alu nung tsük, aonsotsü aser süngjanglijang kechisa inyakteta ali, item ajak asoshi Tsüngrem nem tenüsang agüja ano temoatsü meshia amungba dang Tsüngremmung ta ajar. Ao lima nung Tsüngremmung ya mezüng Longsa nung tenzüksi nungji, mapang talangka Longsa tama mungerang Ao yim balala nung mungyonga aoba otsü jagi ashir.

Yamaji Tsüngremmung mapang balala nung munga alidang, Dr. & Mrs Clark-i Ao limai tamangba yimsü den kakat shisatsü bener arua Impur nung school lapok aser Aor lanurtem anitena züngdaksü. Saka kodang Tsüngremmung mapang mapang arudir yimtsüng shia anogo balala nung sodi agütsütsüsa aküm, ibajagi school nung timtem tulu ajuru. Ibaji ajiteta 1944 küm Ao kakatshir Mungdang (AKM) Longjang yim dak amungdang Tsüngremmung ya Aor ajak lirumedema amungtsü lemtet. Yamaji 1947 nungi August 1-3 Aor ajak sümedema iba benjong munga arur, ta otsü tejangja kar.

Phek nung Project UMMEED: The Hope sentong amenokogo

Dimapur, Chiteni/July 29 (TYO): Taküm kümzüksü atema Phek Police indang Mental Health sentong; Project UMMEED: THE HOPE July 26 nü Superintendent of Police, Phek Dr. Pritpal Kaur, IPS-i, Christian Mission Higher Secondary School, Phek nung tenzüksüogo.

Iba project indang omen ya "Say No to suicide, Yes to Life" lir. Sentong nung o jembiba mapang Dr. Pritpal Kaur-i, mental health dak sendakba nung tebilemtsü alibatam

tangsa tang bentettsü koda tongtibang iba indang lemsatepa liasü.

Dr. Kaur-i sentepa aliba lokti dang ashiba agi, jongdak nüngdak mesüra teyari nüngdaka call asübatem atema telangzüba agütsütsü asoshi District Distress Response Team (DRT) ka tentetogo.

Dr. Kaur-isa, helpline ya 24x7 inyaksangshitsü aser call asürtem maitsü ya memetdaksütsü aser nüngdaka aliba nisungtem nem counselling agütsütsü, ta ashi.

Emergency aser Distress Helpline Numbers (DRT) tem: 1. 6009308170 2. 8729923553 3. 9862200699 4. 7005532585

Sentong nung o tatsüka jembiba mapang Sakhi One Stop Centre nungi Jitsisiasa aser District Hospital Phek nungi Psychiatrist Neichulou nati mental health ya koda tongtibang iba indang lemsatepba den nüngdaka alirtem nem teyari agütsütsü koda tongtibang iba indanga lemsatepa liasü

Kohima nung Job Fair ka agiogo

Dimapur, Chiteni/July 29 (TYO): Ministry of Labour & Employment kübok National Career Service for Centre for SC/ST Kohima aser Regional Employment Exchange (MCC) Kohima, AIDA, Don Bosco Job Placement Network Dimapur nung longjemer Regional Employment Exchange Kohima (MCC), Directorate of Employment SDE, Kohima nung July 29 nü Job Fair ka ayongzüka agiogo.

National Career Service for Centre for SC/ST Kohima nungi Sub-Regional Employment Officer R. S. Siipuni Pou-i ashiba agi, state aser linük kübok tesem balala nung

company tem nung mapa inyaksü atema maongka agütsütsü asoshi mapa bushirtem nem sabang ka agütsütsü atema iba amala Job Fair ya mapangshia ayongzüka agia arudar.

Mapa bushiba candidate tem tam asadanga interview agiba sülen mapa balala nung anioker.

R. S. Siipuni Pou-isa, Job Fair nung Chillibreeze, Talent Acquaintance, SBI Life, T Tec (online Interview) aser Apex Motor Enterprise, Dimapur, Nagaland ta company pongui shilem agi aser parnoki mapa bushirtem anioktsü atema interview agia liasü.

MDBSG Induction & Re-Affirmation sentong agiogo



Dimapur, Chiteni/July 29 (TYO): Mokokchung District Bharat Scouts and Guides (MDBSG)-i ayongzüka July 28 nü DC Conference Hall, Mokokchung nung Induction aser Re-Affirmation sentong agiogo.

Sentong nung Deputy Commissioner, Mokokchung, Ajit Kumar Verma maneni tir asütsü shimshi aser DSO, Zhopovi Zech District Commissioner, Sr. SDEO, Tarepkaba District Secretary aser Dr. Sholongba, PHC, Ungma, MDBSG Vice President ama shima liasü.

Sentong nung o jembiba mapang Ajit Verma-i, Scouts and Guides tem ya historical movements nung tera yangloka alitsüla aser lanurtem dang yimya yimpong tajung sayutsüla aser iba den linük aser lokti terenlok tanüla

jangrushidaksütsü atema tali bendanga agütsüshitsüla, ta ashi.

Sentong ya MTBA Y/M Youth Director Akangtemsu Yaden-i moaja liasü. Sentong nungsa Tovili Wati (DOC)-i lokti pela agizükba o jembia, Samuel Sumi, S/M-i tepela o jembia aser Sentila Chang G/C-i tatem sarasadem agia liasü.

Dimapur DC-i Aug 1 nü senden ayonger

Dimapur, Chiteni/July 29 (TYO): Dimapur Deputy Commissioner-i sangdong ka ajanga, Administrative Officer, Department tekolaktem aser tejaokertem ajak, August 15 nü 79buba Independence Day anogomung atema renemshiba senden nung arua shilem agitsü metetdaksüogo.

Iba senden ya August 1 nü DC Conference Hall, Dimapur

nung 10:00 ako nungi tenzüka amentsü. Senden nung sensaksemstsü aliba onüktem rongnung taruba Independence Day anogomung atema mapa alemtsüba densema lir.

Maneni DC-isa, ketdangürtem dang mapang takok ngua bener aotsü asoshi iba senden nung tamakok maludaksüi shilem agitsü mepeshia metetdaksüogo.

Mkg. DC-i I Day indang metetdaksü

Dimapur, Chiteni/July 29 (TYO): Mokokchung Deputy Commissioner Ajit Kumar Verma, IAS-i sangdong ka ajanga, ward councilors ajak, ward 18 MMC, Ungma, M o k o k c h u n g , Chuchuyimnpang, Khensa yimtsüng nungi Village Council züngsemtem aser GB Union, Mokokchung jila GBs Union, kiyong balala nung ketdangsürtem aser

Mokokchung jila nung aliba nüburtem dang August 15 nü Independence Day sentong ya teti ama Imkongmeren Sports Complex nung anepdang 8:40 ako nungi tenzüka agitsü, ta metetdaksüogo.

Iba dak sendakba nung ken o dak sendaka alirtem aser Mokokchung jila nung alirtem dang sentong nung jangrabangra arua shilem agitsü mepeshia metetdaksüogo.



July 29, 2025 nü Mandi, Himachal Pradesh nung tzünglu sashia aruba sülen anentsüh alua aliba noksa nung angur.

Congress -i army operations ajak ashishir: PM

New Delhi, Chiteni/July 29 (Agencies): Mongolbarnü Parliament nung Ato kilonser Narendra Modi-i, Congress party-i army operations ashishir, akhidang nungi sepaitem inyaksangshi ashishiba ya Congress yimya lir, ta aitsü.

Pakistan anema Operation Sindoor agiba dak sendakba nung Modi-i, 2017 küm kiralongrartemi Uri amakba sülen India sepaitemi surgical strikes agia Pakistan occupied Kashmir nung kiralongrartem camp amakdanga Congress-i ashishia liasü, ta ashi.

Lok Sabha nung Operation Sindoor atema o entepba mapang nung Ato kilonseri, "Ajisüaka parnoki nüburtem melung metetba sülenbo Congress-i, par sorkar aliba mapang parnokia surgical strikes agiogo ta jembir," ta ashi.

"Army anemba aser

ashishia jembibaji Congress party tejen yimya ka lir. Tawa linüki Kargil Vijay Diwas mongogo, ajisüaka Congress sorkar aliba mapang nung aser tanüa Congress-i Kargil rara nung asenoki takok anguba magizükteter mesüra Kargil Vijay Diwas mamonger mesüra Kargil takok metushir," ta paisa metetdaksü.

2019 küm Balakot amakba kuli noksa sayuang ta Congress-i akhangba aija Modi-i, "Pakistan-i IAF pilot Abhinandan apuba mapang nung India nung karibo, joko Modi tejenbulen mali ta jembia liasü," ta metetdaksü.

"Pilot Abhinandan apuba mapang nung Pakistan nung pelatetbaji tim dang, kechiyong parnoki Indian Air Force nungi pilot ka apu. Ajisüaka yangia karibo 'Joko Modi tejenbulen mali, pai kechi inyakdir' ta

jembia liasü. Abhinandan meyipa aru, nüma tanga aser ajaki akhümtsübua pa meyipa aru," ta pai metetdaksü.

"Pahalgam amakba sülen Pakistan nungeri BSF sepai ka apu. Iba mapang nungjia parnoki [Congress], joko Modi tejenbulen mali ta bilema liasü. Modi tenüng menüksü ta parnoki bilem aser social media nung osang balala prokshia liasü. BSF sepaiji koma asütsü? Par kibong koma asütsü? ta parnoki jembir. Ajisüaka BSF sepaiji nüma tanga aser ajaki akhümtsübua meyipa aru," ta paisa metetdaksü.

Pakistan nunger drones aser missiles nokdangtetba atema India nunger air defence system tenüngsanga Modi-i, "Ni dang masü saka linük nung aliba nüburtem ajaki nenok (opposition) menütsür," ta ashi.

5buba Sansad Ratna Awards sentong agiogo

New Delhi, July 29 (Agencies): Mongolbarnü New Delhi nung aliba Maharashtra Sadan nung 15buba Sansad Ratna Awards 2025 sentong agia 18buba Lok Sabha nung tangar dang nungi alakteta shilem tajung agitetba Members of Parliament (MPs) aser Parliamentary committees nem sempet agütsüogo.

Iba sentong nung Lok Sabha aser Rajya Sabha nungi nisung 17 aser Parliamentary Standing Committees ana nem Sansad Ratna Awards agütsü.

Iba award atema MP tem aser Parliamentary Committees ji Jury Committee kati shim. Jury Committee nung tongtiji National Commission for Backwards Classes (NCBC) nung chairman, Hansraj Gangaram Ahir liasü.

Sansad Ratna Awards sentong nung sempet lema agütsürtemji tongti tejaoker Union Cabinet Minister for Parliamentary Affairs & Minority Affairs, Kiren Rijuju, Jury Committee nungi Hansraj Gangaram Ahir, Jury Committee

nung Co-chair Bhartruhari Mahtab, taoba mapang Chief Election Commissioner T S Krishnamurthy aser Prime Point tentetsang K Srinivasan nunger liasü.

Sansad Ratna Awards ya 2010 küm Prime Point Foundation aser eMagazine PreSense nati tenzüka liasü. Taoba mapang linük Tir, (asür) Dr A.P.J. Abdul Kalam-i iba award tenzüksü apiteta liasü aser 2010 küm May ita nung Chennai yimti nung mezüing ayongzükba award sentongji Dr Kalam-i tenzükjia liasü.

Tanü agiba sentong densema tang tashi nung iba award sentong 14 ben agiogo aser item sentong nung sempet 125 agütsüogo.

Taküm iba award angur MP 17 nungjagi parnok pezü nembo Special Awards agütsü. Par pezüji Bhartruhari Mahtab (BJP, Odisha), N.K. Premachandran (RSP, Kerala), Supriya Sule (NCP SP, Maharashtra) aser Shrirang Appa Barne (Shiv Sena, Maharashtra) nunger lir.

16buba aser 17buba Lok Sabha

nung parnoki tangar dang nungi alakteta shilem kanga junga agiogo aser tang tagidak Lok Sabha nunga shilem junga agidar.

Iba award angur tanüingba MP temji Maharashtra state nungi Smita Uday Wagh (BJP), Arvind Ganpat Sawant (Shiv Sena UBT), Naresh Ganpat Mhaske (Shiv Sena), Prof. Gaikwad Varsha Eknath (Indian National Congress), Dr. Medha Vishram Kulkarni (BJP) nunger lir.

Tanga states nungi iba award angur MP temji UP nungi BJP MPs- Praveen Patel aser Ravindra Kishan Shukla na, Jharkhand nungi BJP MPs Dr. Nishikant Dubey aser Bidyut Baran Mahato na, Rajasthan nungi BJP Mps P.P. Chaudhary aser Madan Rathore na, Tamil Nadu nungi DMK MP C.N. Annadurai aser Assam nungi BJP MP Dilip Saikia nunger lir.

Ano iba award anguba Standing Committees anaji Standing Committees Standing Committee on Finance aser Standing Committee on Agriculture na lir.



IDBI BANK

IDBI Bank Limited
Dimapur, Nagaland Leirauki, 1st Floor
Khormal Junction, P.O. 173 Dimapur
Pin : 797112, Nagaland

APPENDIX IV [RULE 8(1)] POSSESSION NOTICE (For Immovable Property)

Securitisation and Reconstruction of Financial Assets and Enforcement of Security Interest Act, 2002 (54 of 2002) aser Security Interest (Enforcement) Rules, 2002 kübok Section 13(12) den rule 3 nung amshiba tashi amshia IDBI Bank Limited nung authorized officer-i SARFAESI Act kübok Sec 13(2) nung ajemdaker **19-03-2025** anogo nung Demand Notice ka ajanga Applicant/Sen apur - **Shri Kivigho Zhimomi (Applicant, S/o Azheto Zhimomi)** aser Co-Applicant/ Co-Sen apur - **Smt. Rongsennaro R Imchen** na dang notice nung shia aliba ama 10-12-2024 anogo tashi nung sentsüh **Rs. 1,36,81, 167.40/- (Rupees One Crore Thirty Six lakh Eighty One Thousand One hundred Sixty Seven & Forty Paise Only)** aser iba mapang nungjagi tenzüka sen tetemlok ajak notice agütsüba anogo nungi tenzüka anogo 60 tsüingda agüjang ta metetdakja liasü.

Ajisüaka sen apuri sentsühji magütsütet, anungji sen apur aser public dang ya sangdonger, tsüinglanglen sign süa aliri iba Act nung sub-section (4) aser Security Interest (Enforcement) Rules, 2002 nung section 13 kübok pa nem agüja aliba tashi amshia **2025 küm July 23** anogo nung tsüinglanglen shia aliba kiojenji agiadokogo ta sangdonger.

Talisa sen apur aser public dang iba kiojen dak sendakba nung kecha inyaksangshi masütsü metetdaksür aser kari ibaji anema inyakra IDBI Bank Limited nem 10-12-2024 anogo tashi nung adokba sentsüh Rs. 1,36,81,167.40/- (Rupees One Crore Thirty Six lakh Eighty one Thousand One hundred Sixty Seven & Forty Paise Only) aser sen tetemlok agütsütsüsa akümtsü. Sen apur dang iba Act nung section 13 kübok sub section (8) nung aliba ama mapang shidak nung kiojenji alangzüksü metetdaksür.

KIOJEN OSANG TEJANGJA:

(A) Mortgage asüba kiojen : Dimapur District, Nagaland, Pin - 797118 nung Baptist Church anasa Village, Signal Angami, Mouza No. - 03, Palla No. - 927 nung aliba ali tasazük sq.ft. (In Total) kimong den külemi ki aser yangji aliba ajak: **North tsütsülen:** Approach Road lir; **South tsütsülen** : T. Rio'er kimong; **East tsütsülen:** Saku Toshi'er kimong aser **West tsütsülen:** Margaret Serna'er kimong. Together with all and singular the structures and erections thereon, both present and future.

Date : 23.07.2025, Place : Dimapur, Nagaland Sd/- Authorised Officer, IDBI Bank Ltd.

Trump ya tiyazü jembir ka, ta Modi-i shitettsü asü?: Rahul Gandhi

New Delhi, July 29 (Agencies): Mongolbarnü Lok Sabha nung Operation Sindoor atema o entepba mapang nung Congress lenir, Rahul Gandhi-i, iba exercise (operation sindoor) ya Ato kilonser tenüngmenükba nungi kümzüksü atema agiba liasü, ta ashi.

US Tir Donald Trump-i, pai tiyongtsüi ia jembiba ajanga dang Pakistan aser India na tsüingda rara anena liasü, ta jembiba dang sendakba nung Rahul Gandhi-i Ato kilonser Modi dang, "Nai Trump ya tiyazü jembir ka, ta shitettsü asü?" ta asüingdang.

"Indira Gandhi dak aliba tasütait tanela shilem 50 danga Narendra Modi dak lira pai iba House nung 'ceasefire dak sendakba nung Trump-i tiyazü

jembio' ta shitettsüla," ta Lok Sabha nung opposition lenir, Rahul Gandhi-isa metetdaksü.

"Kiralongrartemi Pahalgam amakba ya Pakistan General Asim Munir ajanga lir. Tawa pai US Tir Donald Trump ajurua chiyunga senden amen. Ajisüaka iba dak sendakba nung Ato kilonser Modi-i kecha mejembi," ta paisa metetdaksü.

Pakistan den rara anenba dak sendakba nung sorkar aija Rahul Gandhi-i, "India sorkari Pakistan sorkar dang, yimtenren tsütsü nungi onoki telemtetba magi, onoki meraraner ta ashi. Onoki iba (operation sindoor) ya odang agiba lir ta ashi. Surrender asütsü atema takhangba agütsü, minute 30 tsüingda asenoki 'surrender' süadok," ta ashi.

Jharkhand nung temeshi aini aoer 6 gari lendong nung asü

New Delhi, July 29 (Agencies): Mongolbarnep 4:30 ako meta Jharkhand nung Mohanpur kübok Jamuniya arem anasa temeshi aini aoertem mena aliba bus ka gas cylinder bena aliba truck den tsüktepba lendong nung nisung trok asü.

Deoghar Sub Divisional Officer, Ravi Kumar-i, temeshi aini aoertemji passenger bus ka nung Basukinath tekülem kidangi aoba mapang nung iba lendong ya atalok, ta metetdaksü.

"Bus aser truck na tsüktepba sülen bus ji süklep 100-200 shi oa tsükok," ta pai ashi.

Osangbenertem den jembidang Deoghar Deputy Commissioner, Naman Priyesh Lakra-i, iba lendong nung yirur nisung ti AIIMS nung treatment agidar aser tanüingba nisungtemji Sadar Hospital nung

mongdar, ta metetdaksü.

"Bus anisangji densema nisung pongu iba tesem nungjisa asü. Iba lendong atalokba osang angashiba sülen police den medical team iba tesem jagia oa yirua alirtemji kümzüka Sadar Hospital-i anir ao," ta SDO Kumar-i metetdaksü.

Traffic Deputy SP Laxman Prasad-ibo, iba lendong nung nisung 9 süogo, ta metetdaksü.

Ano MP Nishikant Dubey-ibo X ajanga, "Kü Lok Sabha Constituency kübok Deoghar nung bus-truck tsüktepba lendong nung temeshi aini aoer nisung 18 süogo. Tsüingremi takoksa angur kibongtem nem tashi agüjang ta sarasademtsür," ta metetdaksü.

Ato kilonser Narendra Modi aser Jharkhand Chief Minister Hemant Soren natia iba lendong nung takoksa anguba kibongtem den mangyim jashi lemsatep.



TIR YIMYIM YIMOBILEM (EDITORIAL)

DIMAPUR

RASEMNÜ

CHITENI 30, 2025

Ochi asü, nütsüng aika agitsü ?

Taküm 2025 küm November ita tashi nungbo Bihar nung assembly election agitsü lia tang aritepa electoral roll reprangshitsü atema Special Intensive Revision (SIR) sentong tenzükba ya odangbo masü saka tanga aruya aliba election dak rangloker government nung alirtemi inyakba sentong ka lir ta ajaki angateter, ashi yamajika masü nungbo kodaser tang election agitsü ita anasemka lia electoral reprangshitsü bilemtettsü. Iba jagi Congress teloki anir opposition purtemi Bihar nung tang electoral roll revision-ji magitsüla ta nokdaker. Ajisüaka, government-i Election Commission ajanga inyakdaksür asünungji, nokdangaka menokdangtet Special Intensive Revision mapaji inyaka odagi aser joko taruba ita August ka nübo mezüng züludenba, draft roll, bo adoktsü aser enoksemttsü aser endoktsü alinunga ita ana mapang agütsür September 30 nübo joko ajak renemer adokadoktsü, anungji iba electoral roll yur election agitsü. Aji oda, BJP teloki aniba government-i Special Intensive Revision mapaji atemtsü ariteper saka opposition teloki iba mapaji anena atatsüla ta atsütepba mapang ka nung, Supreme court nung obendangertemi teindang o ka arubaji, kodang aser kong südörösüaka electoral reprangshibaji voter tajemba akümtsü asoshi masü saka teimba akümtsü tangatetba nung inyakttsüla, kechiyong electoral roll nung alir voter-tem rongnung tasüba aliyonga taoba mapang arishi küm 18 majungba agi electoral roll-i meitet atartem kanga agia teimba asütsü. Ashiko, tang aritepa Bihar nung electoral roll reprangshitsü lemtetbajibo taoba mapang meinoksemi alirtem enoktsü asoshi masü saka voter asütsüsa shitakba telidak senso masü ser nung electoral roll nung enoka alirtem endoktsü nükjidong nung inyakba sentong ka liasü ta angateter, iba jagi tang electoral roll nung enok alirtem rongnung lakh ta masü saka crore dak tali endoktsüsa inyakteta lir. Atangji, electoral roll nungji metemsüba aser maliba purtema enoka alitsü, anungji tang ama meyipa reprangshia yanglushiba mapang nung itemji endoktsü, ajisüaka electoral roll nung enoka alirtem aser meinoki alirtem rongnunga temsüa alirtem ket nung senso temeten angutsüsa nungdakba kuli kaket lira, itemji jepa yutsür, kodaser senso ka electoral roll nungi tenüng agientsütsü ? Iba temeten aser tim teinyaktsüyimji angateta, Supreme Court-ia electoral roll yanglushiba ajanga voter majemtsü saka teimba-ang akümtsü, anungji sensosanger ket nung Voter's Identity Card aser Aadhaar card lira, tang atemabo iba kuli jagi senso tajunga ta sayur, anungji yimten temeten agütsütsüla ta Election Commission dang ashibaji shitak aser teindang o ta angateter ase iba o nungji sensosangertem mulung anisüngzüka angur. Aji oda, sensosanger ket nung akaba Ration Card kija agibo senso ka ayak aser temetenbo mebendangtettsü saka tang tang atemabo Voter ID card aser Aadhar number agi senso ka tenüng electoral roll nung tenüng zülüoktsüba temetenbo agütsütettsüla ta Supreme Court ajanga tetuyuba agütsübbaji kanga teindang aser terajem o ka lir. Iba jagi Bihar nung nisung aika vote magütsütettsüsa küma oa aliba tensa tia nungi kümzüksü. Atangji,, alima nung inyakyim ajak nung langkabosa meshitak alitsü, anungji voter's Id car aser Aadhar akartemjia karbo shitakba senso masütsüa akok, saka ibaji bendangtsü tasak, anungji meputet odang odaktsür. Ajisüaka, tanü putu nung senso ka ayak aser temeten jangjatsüba kuli kaket tajungtibajibo voter's Id card dang nungibo ano Aadhar-sa tajungba aser tejangjaba kümogo. Ibayongji, asenok mapa ajak nung Aadhar card amshir. Aji oda, tang Bihar nung electoral roll revision agiba ya linük ajak asoshi lenisüba inyakyim ka kümer benshia aotsüsa akümtsü. Joko, asenok asoshibo electoral roll revision dang masü saka nütsüng yongsük sükdangba, census, agiba sentonga yakta tenzüktsü. Atangji, Supreme court nung obendangertemi ashiba ama, electoral roll reprangshiba mapang nung ama, census agiba mapanga nütsüng nüboji teimba kümer asütsüla. Ajisüaka, ashiko, asenokbo tajemba-ang akümtsüa akok. Aji oda, asenok asoshi ochi agitsü asü (?) mesüra tiyazü nung nütsüngang aika agitsü(?) ta asüngdangba langzütsü anogo ka tonga arudagi.

OLEMSABANG

Tanü putu sports ya kanga tongtiband kümogo

I. Zülü Pongen

"Asayar kaji libaliro aser achiajemba nung azüoktsüla"

Alima ajunga nung sports ya kanga tongtiband ka kümogo, ya nübur ajaki sapuba taküm nung asaya shilem ka lir. Ao o nung iba dangi saisapong ta ajar.

Iba saisapong ya zünger mezüngmai lir, ano aika tasen purateta aotsü. Ibai akhi alemli nungi peipei kin asaya balala benshia arudagi, iba denji tanü T.V, paper aser internet balala ajanga pi lima nung tang kechi asayar item ajakji ngua arudagi aser tangsa aji agizüktsü meranga arudagi aser yamaji inyakteter.

Saisapong ajak ya tazüokba temzüng ka yur asayar, iba tazüokba temzüngji kanga shisa kaa tabensa temzüng mesüra yangji rarabangsen adoktsü/lendong adoktsü ana nung lir. Iba saisapong ya temang arakzüa ainba nung kanga tongtiband aser ano ibai tetoktepba yimya asü nung takok angutsü meranga asayateper, iba toktepba yimya yabo tongpang rara mesüka lir saka iba rara yabo tazüokba yimya tajung nung, yimjungren ka nung amalitepa aoba, kadi ka den metettepa aoba, shir kin, shiba tajungba ajak meteta akümer.

Tilateri saisapong aika lir, ajakji tongtiband saka tang alima nung asaya tongtiband rongnung table tennis, badminton, cricket aser football etc...ibaibo tanü T.V nung anogo shia sayia aruba angur aser asen ground nunga asayaba asenok ajaki repranger, anungji, iba nung ajitetba ka tongtibangsa asayartem asoshi ya shinür.

Mezüngbuba nung asayar ya asen ground nung intetba asen club member aser yimer/ward sanger nungi adoktsüla tetezü kodangsa MDFA trophy aser cricket tournament amala ka asayadir meyonger tangar ward/yim/club nungi mesüi player tajungji asen atep nungi adokdaksütsü merangtsüla. Meyonger player tajung ajanga takok tulu bener arutsütsü akok saka tanga limai aotsü tajungtiba asayar shimdang meyongerji dang ner club nungi yokra aji ner atep nungi adokba masü, idakji aküm/tajangzüka maka ama ajiteteter. Player tajungia ner kiyonger/Club/yimeri ne nübu aginüa lira ner kiyong/yimer/club-ji asaya nung aden tashibo naia tangleni maotsüla.

MDFA asayaba ya tan anasatiba asayamung ka tembanga alinungji, ibai tatishitsü ka agidi; iba asayamung nunga club karibo player tajung karbo tanga kiyong/club nungia anir arua asayaba lir. Ibai association-ia mela-a lir, yangi kecha taitsüba mali, saka player tajungtibaji pei atep nungi adokdaksütsü merangtsüla ta shinür dang. Takokba arishir asü nungji champion angutsü meranger, saka tangar aniloker akokba nungji tepela mabensar. Lanur asaya meimer, jangrar sempet tajung aketer jenti lir. Anungji, asayar tajungtibaji ner club/ner association nungi kokaka-mekokaka mejameja sayitet nungbo aji kanga agia mera taketba asütsü ta bilemer.

Lanur tajung asünungji player-bo ajak tajung dang lir, saka tajungtiba akümtsü asoshi tesayur tajungji tangalen nungi nenoki shiba dak mulung alemir iba nisungji anir arua coaching agiang, saka asayamung mapangbo tangar anir arua pei telok nung masayadaksütsüla ta nibo bilemer.

Asayar ka asoshi asayaba temzüngji kanga tongtiband lir, asayar ajaki aji meteta dang lir, saka nisung shia jakla yimya balala asünungji, tazüokba temzüng amshia aseni asen sasa pei jaklaji azüoktettsü merangtsüla. Shiruru dang süaka shiti tulubaia Noa rong nung aitsü meranga pai pa temang azüoka kanga kangshia itetba ama, player tajungtiba ka kümteettsüsa ajemalua azüoktettsü merangtsüla. Asayartem ajaki meteta lir, nai yellow card achitsüba jagi tangari ne jakla yimya meteta akümer aser ano ner team-a menena kümdaktsür.

International player tem asenoki meteta lir, Maradona, Messi, Ronaldo aser ano aika lir, parnok asayaji koma ajung, kara asemba aser discipline koda ajung, parnoki Yellow Card achiba bulua mangutsü, parnoki alima dang pa-a asayar tajung rongnung ka ta sayutsü meranga asayar.

Ano asayar kadi meteta alitsüba kaji achi ajemba nung kanga asüngteta alitsüla, aji ta mesüra nai ne temang azüoka ainba nung balance shitak malitsü. Asayar ka temang moko-sali aser yi aser temesepba chiyungtsü nungi pila-a litetera, ajiang shitakba player tajungji sütettsü. Asenoki asayabo jangrar saka moko-sali aser temesepba chiyungtsü nungi mejenbura ajagi pi (tangar) lima den medemdanga asayatsü makoktsü. Western country den asen India ya aso-ajen balala, ano asen Naga nung North-East nisungtem ya India nung tangar state nisungtem dena tera balala (aso-ajen nung), anungji, asemtepba nung memeneper asayabo tajung saka tangar ajateta mouteter. Ano ibai tulutiba kaji; achiajem mazüoktetba agi temang telunglen poknung timtem aser tenük telen nunga tashi maitba agi tangar memeneper ta ajiteteter.

Anungji, shibai asaya meimer aser sempet tajung keta lir, parnoki ya angateta temang aser achi ajemba nung azüoka tarutsü taküm jenjang yanglutsü merangang ta temulung ronga bilemba khuret ka lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Indonesia linük nung 'Arise Leadership Summit' tenzükogo



July 28, 2025 nü Indonesia linük nung 'Arise Leadership Summit' tentenzük sentong nung Arise Asia Executive director aser CEO, Rev. Dr. David Ro-i jembidang tangokba noksa nung angur.

July 29, 2025: July 28, 2025 nü Indonesia linük nung 'Arise Leadership Summit' tenzükogo; alima nung mission mapa inyaktsü atema Asia nung Khristan lenirtem ayongdentsü nükjidong nung anogo pezünü senden ya ayongzük.

Iba summit tentenzük anogo nung Asia nung aliba Khristan lenirtemi mission wadang tuluba atemzükür inyaktsü atema jembia liasü.

July 28 nungi July 31 tashi ayongzükba senden nung Asia nung aliba linük 22 nungi Khristan lenir 300 shi dendar. Iba senden nung adenertem rongnung lanur Khristan lenirtem aika lir; parnok rongnung pastor tem, youth ministry nung lenirtem, mission aser network lenirtem aika densema lir.

Iba summit ya Arise Asia-i ayongzük. Arise Asia ya 2023 küm nung ang tenzükba mission movement ka lir. Taküm iba summit ya "Locally Rooted, Globally Connected- Go Where There Is No Gospel" omen nung ajemdaker agir.

Arise Asia-i Asia tesem balala nung lanurtem ajungmesoa alima nung Khrista

osang tajung mangashidangba tesemtem nung osangtajung proktsü nükjidong nung inyaker.

Summit tentenzük sentong nung linük 22 nungi lenir kakai pei linük wako amer shilem agi, iba sülen Indonesia nunger sobaliba tsüngsang ajanga shilem agia liasü.

Iba summit tentenzük sentong nung tekülem sentong agiba sülen Khristan lenirtemi salem osang lemsatepba den külemi Asia nung Khristan lenirtem longjemer mission wadang inyaktsü ajungshia liasü.

Nikongdang sentong nung okila jembidang Arise Asia executive director, Rev. Dr. David Ro-i, "Gen Z lanurtemi mapang talangka tenzüksü mejangrar, ajisüaka parnoki langka tajung atemabo taküm-a bendanga agütsütsü metsübur. Khrista memetetba tesemtem nung Khrista osangtajung lemsateptsüji taküm ali langer aser taküm bendanga agütsütsüa langer," ta ashi.

Rev. Ro-isa, "Joko Asia nung aliba Arogotem aika missionary agizükertem masü saka missionary yokertem kümogo. Asia ya mission field ka aliba nungi mission mapa

inyakertem kümдар. Anungji Arogotemi Kibubai tenyaba wadang tuluba inyaktsüla aser mission wadang inyaktsü atema lanurtem ajungshitsüla," ta ayongzük.

Rev. Ro-isa tesüiba küm ishika tsüngda Arise Asia-i wadang aika takok ngua inyakba lemsatepa liasü.

2023 küm Bangkok nung Arise Asia tenzükba sentong nung Khristan 1,800-i shilem agia liasü, aser tangbo iba movement ya tesem aika nung prokogo.

Indonesia nung ayongzükba anogo pezünü summit nung o lemtepa sentongtem agitsü, workshop agitsü, tekülem agitsü aser sarasademtsü.

Arise Leadership Summit ayongzükertemi ashiba agi, iba summit nükjidong ya ajungmesotsü atema dang masü saka lanur lenirtem aika aniteta arrtsü adena osangtajung prokba nung shilem agidaktsütsü atema lir.

Rev Ro-i, "Iba ya sentong ka dang masü kintem rongnung Tsüngremer wadang inyaktsü atema Asia nung aliba Arogotem asüngsashiba sentong lir," ta metetdaktü.

ANOGO ABEN TSÜNGREM DEN

Melangzüba Tasüngdangba (T.Ken 77:7-10)

Langzütsüba dang nungi asüngdangtsüba temelaba. Item tekongtem nung tasü mait nisung kati tasüngdangbatem asüngdangba angur. "Kibubai teti asoshi ni sentokdi ma? Pa taochi teti asoshi oadokogo ma? Pai nangzükba joko amajok asü? Pai ain adoka pai taochi shibangogo ma?" (t.7-9). Aser tatem nung yamai ashi, "Ya ni tashi maitba; saka tematiba teka tajichilen aliba mapang ni bilemtet" (t.10).

Kodang asenok timtem ajanga odir asenoki yimya agi tasüngdangbatem asüngdang. Dawid sarasadem, "Kü Tsüngrem, kü Tsüngrem, kechiba nai ni sentoker?" (T.Ken 22:1). Yisua kangki nungi iba o jembi (Matt. 27:46). Kodang asenoki timtem ajanga odir, asenoki Tsüngremi yaritsü aser kümzüktsü imlar. Aser kodang kümzüktsü atar asenoki maremzüker. Iba mapang nung tasüngdangba asüngdang.

Tsüngrem dang ochi shia ashitsü tsübua teli. Pa dang ne tebilembatem shiang. Pai na anemsü mesüi ochi shia lidaktsüner. Saka ya bilemtetang: Khristan ama, asenoki rasaa ashiba nung masü; tenangzükbatem nung asenok alir. Tatishitsü agi, Tsüngremi iba tasüngdangba langzütsü tenzük. Kibubai teti asoshi sentoktsü asü? Masü. Pai ojang aochitsü asü? Atangji, Pai maongka sayutsü Pa taochi teti asoshi oatoker asü? Masü. Tsüngremi item tasüngdangbatem ajak langzüra balaka asütsü asü? Ne mulung tera süneptsü akok, saka tiajibo memelenshir. Tamang ajanga liang, tanguba agi masü. Kibuba tenangzükbatem nung amangang. Pai memelenshitsü.

Tsüngremi ne timtem nung tetibo ratetta mashitsü, saka Pai pa o tenangzükbatem agütsür. Na teimla makai tasü mait akümdang, sarasadem nung ne tasüngdangbatem Pa dangi bener arung, Pa o tenangzükbatem nung temulung leman. Tsüngremi ne nüngdaktem metet aser itemji agütsütsü.

Pakistan nung Khristan 100 chioktsü atema ministry kati inyaker

July 29, 2025: US nung aliba Khristan organization kati Pakistan nung lungro yangluba industry tem nungi Khristan kibong 100 dak tali chioktsü nükjidong nung maparen tenzükogo.

Khristantemji lungro yangluba industry balala nungji kangshia mapa inyadaktsür.

Alar ama kangshia mapa inyakdaktsüba ya ozüing alema lir, ajisüaka Pakistan nung Khristantem densema nütsüng ajema alirtem mapa tasak kangshia inyakdaktsür.

Alima tesem balala nung reshikangshi ajangshiba Khristantem yariba telok Global Christian Relief-i Pakistan tesem balala nung lungro yangluba industries nung inyakba Khristan 100 dak tema kibongtem sentsüh aotsütsü, ta metetdaktü.

Global Christian Relief-i Khristan kibongtem nem senotsü aser shisaliok teyari agütsüba den külemi lanur 380 nem vocational training agütsütsü, kibong 20,000 nem healthcare agütsütsü aser tetsür 325 nem business tenzüksütsü nükjidong lir.

Pakistan nung Khristan kibong aikati sen apuba sülen sentsühji aotsü atema lungro yangluba industries nung inyaktsüsa akümer. Parnoki ghonda ka mapa inyakba nung sen 25 shi dang angur aser ibajia sen tetemlok (interests) katiba sülenbo tera dang angur, ta Global Christian Relief-i metetdaktü.

Yamaji sentsüh tali-tali bendenloka kibong rangben mapa inyaktsüsa akümer. Pakistan nung kangshia mapa inyakdaktsüba ya 1992 küm

nokdanga liasü, ajisüaka tang tashi ibaji junga menokdangteter.

Yaküma iba organization-i Raheel aser Ruth'er kibong densema Khristan kibong 50 yaria liasü. Rahee'er kibong ya tesüiba küm 25 tashi lungro yangluba industry nung inyaker.

Tamalen Raheel tetsü tetsüng treatment agitsü atema dollar sen 875 apua liasü, aser iba sentsühji aotsü atema par kibong anepongi 1:00 ako nungi nikongdang mamang tashi lungro yangluba industry nungji inyaka aruogo.

Global Christian Relief-i par sentsüh ajak aotsüba sülen Raheel aser Ruth nati aonsotsü ayokba business tenzükogo aser ki tasen ka nung lidar.

GCF-isa Khristan kibong-

Khalid aser Shabana na sentsüh aotsü. Tenati Khalid'er aianu kibong akümtsü atema dollar sen 213 apua liasü, saka iba sentsühji moutetba ajanga tena den par jabaso ajak tesüiba küm 15 tashi lungro yangludak industry nung inyak aser sentsühji dollar sen 875 kümer liasü.

Yamaji Khirstan kibong Asid aser Rabia natia tanur rangtettsü atema sen aika apua liasü aser iba sentsühji aotsü atema tena küm 8 tashi lungro yangluba industry nung inyak, ajisüaka yaküm GCF-i sentsühji aotsüogo.

Pakistan nung nütsüng shilem 1.27 dang Khristantem lir. Iba linük nung Khristantembo mapa tilateri dang inyaktsü maongka angur. Khristantemi rongsenkettzüng aser shisaliok tsütsü maongka

manguba den külemi Tsüngrem mezügmeshiba ozüing kübok aiben Khristantem nem tai tonglokja apur.

Pakistan nung lungro yangludak inyakertemji teimbaka Khristantem lir. Parnoki anogo shia lungro 2,000 tashi yanglur saka sentsüh otettsüsa sen maazükür.

Global Christian Relief Tir, Brian Orme-i, "Ni Khristan kibongtemji aika ajurua jembiogo. Onoki Khristan kibongtem nem sen agütsüba ajanga parnok sentsüh otetba dang masü saka talenba nungia salaogo," ta metetdaktü.

2025 küm United States Commission on International Religious Freedom (USCIRF)- i Pakistan ya "countries of particular concern" (CPC) nung züngoka lir.

AO OSHI ANGAZÜKDAK:
TANÜ ANGAZÜKTSÜBA OJANG



Terungkak

(adj) mi agi rungloka arung (burnt-out, burnt badly)
* Chi terungkak asüba agi azüia machi yutsü.

Tesa

(n) temang nung tesaret aliba tesem (ribs portion in our body)
* Yisu dak tesa nung nü agi atsüng.

OLONG PAITEP # 7223

1		2		3			4		5	
							6			
7							8			9
						10				
11	12		13		14			15		
			16							

TIPIEN		LANGTSÜNGLEN
1. Ajurunüa bilem	- (8)	1. Tembar - (7)
6. Ozü ka tenüng	- (4)	2. Tejen lai nung kaket 34 buba - (5)
7. Mi apudak	- (6)	3. Meimchir - (6)
8. Tali	- (4)	4. Ajungbena tsübua ait - (5)
11. Mangmang	- (4)	5. Ajangtet - (5)
14. Shitak masü	- (6)	9. Azü atsük - (7)
16. Meshiteta among	- (8)	10. Tekangshi - (6)
		12. Sabua bilem - (5)
		13. Toktep - (5)
		15. Ayazük - (5)

OLONG PAITEP # 7222 TELANGZÜBA

TIPIEN :	LANGTSÜNGLEN :
2. Temerang, 4. Yimra, 5. Jaksa,	1. Sayatenya, 2. Tera, 3. Rajang,
7. Tia 8. Ilang, 9. Arr, 11. Anga,	6. Alaka, 8. Injang, 10. Akok.
12. Akhüm, 13. Süngtsük.	

NAI-A YA METETTER MA

Test asaya nung run 5000 takaratiba
yangluba asayar tem

PLAYER	TEAM	INNINGS	TIME TAKEN
DON BRADMAN		56	9Y 234D
JACK HOBBS		91	21Y 66D
GARRY SOBERS		95	12Y 127D
SUNIL GAVASKAR		95	8Y 197D
VIC RICHARDS		95	9Y 205D
MATTHEW HAYDEN		95	10Y 127D
WALLY HAMMOND		97	8Y 360D
KEN BARRINGTON		97	10Y 78D
STEVEN SMITH		97	6Y 246D
LEONARD HUTTON		98	14Y 30D

Manipur: Nüburtemi Thoubal mozüki raksatsü



Imphal, Chiteni/July 29

(Agencies): State sorkari
achaayangba Thoubal District
Hospital nung Hombarnü tetsür
ka tanur sor asüba sülen
mepetmesü adoka liasü. La ya
medical tsütsü aibelenba ajanga
asü ta osang prokshiba sülen
mepetmesü adoka liasü.

Iba tatalokba sülen longkak
aitertemi Mongolbar anepdang
mozüki nung osettem raksatsü,
emergency service tem sota ata
aser casualty ward ghonda aika
nokdanga liasü.

Thoubal district kübok
Tekcham Mayai Leikai nung alir
arishi küm 32 tain Maibam
(Ongbi) Samita asüba osang
angazükba sülen par kinunger
aser iba tesem nung alirtemi

mozükidang longkak aita liasü.
Parnoki ashiba agi, surgery
mapang la indang poktsütem
rangpoktsüba agi la asü.

Hombarnü 10 ako meta
tebur chanu ka asoba sülen kasa
anogo aonung 10 ako shi nung
la asüba osang lar kinungertem
nem agüja liasü.

"Iba osang ajanga par
kinunger aser local tem kanga
mit adokdaksü, shirnok longkak
aittsü atema mozükidang
adenshia liasü. Parnok ya
mozüki tonga aruba sülen
mozükidang staff tem den
mangatetep adoka liasü," ta
police ketdangsür kati ashi.

Iba sülen tensa mejungi aküm
aser longkak aitertermi mozüki
nung osettsüt balala raksaja

liasü. Ajisüaka police teyongtsüi
aiba sülen tensa azüoka liasü.
Iba sülen police-i tsümanag ya
post-mortem atema Imphal
East nung JNIMS Hospital-i
yoka liasü, ta parnoki ashi.

Asüla kinungbo Maibam
Ojit-i ashiba agi, "parnoki
treatment tai agütsür kü
kinungtsü tepset. La
mozükidangi anema dang aru
aser la sasa jajateta liasü.
Surgery agiba sülen langka
timtem atalok." Paisa, Samita-i
mezüng asoba tanur ka lir ta shia
parnok tarutsü atema tapet
temenok agütsütsü ayongzüka
liasü.

Police-i ashiba agi, formal
tashishiba ka agütsür parnoki
bushisüngdang tenzüksü.

Assam: Uriamghat nung arem ali atsünger aliba azüngtet tenzükogo

Guwahati, Chiteni/July 29

(Agencies): Assam sorkari
Uriamghat kübok ozüng alema
arem ali atsünger alirtem dak
rangloker Mongolbarnü nungi
Rengma Forest Division nung
ali azüngtettsü tenzükogo.

Iba sentong ya Golaghat
district kübok Bidyapur dak
rangloker ali bigha 11,000 shi
meyipa agitsü atema inyakdar,
ta ketdangsürtemi jangjatsüogo.

Forest ketdangsür tejentemi
ashiba agi, iba tesem ya tuluka
atsüngatokogo. Mezüngbuba
shilem Mongolbarnü
tembangogo aser maneni
benokyonga aotsü imlar

Ali atsünger aliba

azüngtetba inyakyim ya
anepdang yakta tenzü. Iba
mapa atema excavator aser
bulldozer 150 dak tema yok
aser Assam Police, CRPF, aser
Forest Department nungi
personnel temi inyakyim nung
teyari agüja liasü.

Iba tesem nung dokan, ki
aser khen atema yanglu aliba
ki o jentem bentsüyonga aoba
mapang security force temi iba
tesem temeket azüoka liasü.
Ketdangsürtemi ashiba agi,
inyakyim kecha tetsüdahtsü
makai yimjung nung dang
benoka inyakogo, kechiyong
ozüng alema iba tesem nung lia
alirtem timbakati osang

agizükba sülen pei talidak
toktsür or liasü.

Iba inyakyim benoka
minyak tsüngda kibong 1,500
shi nem iba tesem
azüngtettsütsü osang agütsür
liasü. Kasa mapang nung
Forest Rights Committee
(FRC) certificates bena aliba
kibong 500 dakbo iba inyakyim
yagi mekongshi.

Chief Minister Himanta
Biswa Sarma-i July 25 nü
Uriamghat semdanga tensa
asadangogo aser
ketdangsürtem dang temzüng
ozüng kübok yimjung nung
dang iba inyakyim benoka
inyaktsü tetuyuba agüja liasü.

STDCM-i Meitei nunger atema ST jenjang akhanger

Imphal, Chiteni/July 29

(Agencies): Scheduled Tribe
Demand Committee of Manipur
(STDCM)-i maneni Meitei/
Meetei lokti India indang

Scheduled Tribe (ST) list nung
züngoksemtsü takhangba
agütsüogo aser ashiba agi, iba
ya kin aika meyoktepba aliba
Manipur amala state ka nung
parnok taküm liyonga aotsü
asoshi kanga tongtibang lir.

STDCM-i sangdong ka
ajanga Angh Ajay Kumar
Bhalla dang iba ken o ya
tongtibang süa agitsü mepeshiba
den, state aser Centre sorkar

dang iba takhangba ya
ataloktsütsü atema takaratiba
nung jenjang agitsü
ayonzükogo.

Committee-i ashiba agi, ST
jenjang akhangba ya Manipur
nung kin 33 indang temeden
mesüra maongktem rakzüka
agitsü atema masü ta nenshia
metetdaksüogo. Manipur nung
kin 33 nütsünyongsük shilem 41
aser Meitei nunger
nütsünyongsük shilem 53 lir.

STDCM-i anir joko küm ter
dak tema state sorkar balala
dang Centre dangi iba ken o ya
abentsü takhangba agüja

arudar.

Committee-i ashiba agi, state
nung Meitei nunger timba süaka
nütsünyongsük ya 1901 küm
shilem 60.32 aliba taoba küm
110 tsüngda shilem 15.42 agi
tajemba küma tanübo shilem 53
dang kümogo.

Manipur ya 1891 nungi 1947
tashi British yimsüsüba kübok
chubai yimsü asüba state ka
liasü aser 1948 küm Indian
Union nung aden. Ajisüaka
Meitei nungertem ya 1951 küm
Constitution of India benokba
mapang Scheduled Tribe list
nung mezüngoksem.

GOVERNMENT OF NAGALAND

DIRECTORATE OF EMPLOYMENT, SKILL DEVELOPMENT&ENTREPRENEURSHIP
NAGALAND: KOHIMA
NOTIFICATION

Dated Kohima the 29th July 2025

NO.DET-2/14/2001 (PT-II). /1011 List of candidates selected for undergoing training at various Govt. ITIs for the academic session 2025-26/27 is hereby declared by the Selection Board. Candidates may check the result from the Office of the respective Govt. Industrial Training Institutes. Candidates who were not selected in their preferred trade may apply in other trades where seats are available in the same Govt.ITI or in other ITIs if interested, alongwith relevant documents as advertised earliest.

- N.B.:**
- Admission will commence from 04/08/2025 till 30/08/2025. No further admission will be entertained after the expiry of last date.
 - Class/Training will commence from 01/09/2025 (tentative)
 - Original Documents to be produced at the time of admission.

Sd/-
SAVIO VISA
 Director



GOVERNMENT OF NAGALAND

DIRECTORATE OF INFORMATION TECHNOLOGY AND COMMUNICATION

(Below Nagaland Secretariat) Thizama Road "Nagaland : Kohima 797001

No. DITC/ITFirms-1/2013(Vol-II)

Dated Kohima, the 29th July 2025

NOTICE INVITING APPLICATIONS FOR IT EMPANELMENT

In view of the expiry of Empanelment of IT Firms notified vide No. IT & C/5-12/04 (Pt) Dated 13.02.2023, all eligible IT firms operating within the State of Nagaland are hereby invited to apply for IT empanelment. Application must be submitted through online mode via Department portal <https://ditc.nagaland.gov.in> from 1st August 2025, 12:00 PM till 30th August 2025 3:00 PM.

Sd/-
(Er. SABOU YASHU)
 Director



OFFICE OF THE

MANGMETONG SENSO TELONGJEM KOHIMA
 KOHIMA - 797001 : NAGALAND

TENÜNGSANG AGÜTSÜR



Wb.I. Moatemjen Jamir



Dr. B.M. Sunep

Mangmetong Senso Telongjen Kohima, (MSTK) ajanga **WB. I. MOATEMJEN JAMIR**, Printing & Stationery Department nung Director menden tongtetba aser **DR. B.M. SUNEPA**, Animal Husbandry & Veterinary Services Department nung Director menden tongtetba asoshi tenanem tenüngsang aser tetushi agutsur.

Asen teyanglur Tsüngremi nuna wadang ajak nung maneni moajangma.

Sd/-
(N. MEREN LONGCHAR)
 President, MSTK

Sd/-
(S. LIMA JAMIR)
 General Secretary, MSTK



GOVERNMENT OF NAGALAND

DIRECTORATE OF TECHNICAL EDUCATION

Nagaland : Kohima - 797 004



Dt. Kohima, the 29th July 2025

NOTIFICATION

NO.DTE/ESTT-2/NEET/01/2024-25/ Apropos to the letter received from North Eastern Institute of Ayurveda and Homoeopathy (NEIAH), Mawdiangdiang, Shillong, Meghalaya-793018, an autonomous Institute under the Ministry of Ayush, Government of India, has allotted 3 (three) seats each for UG courses in BAMS& BHMS for students from the State of Nagaland for the academic session 2025-26.

Further, it may be noted that for these reserved seats for the State of Nagaland, interested candidates who have qualified in NEET (UG) 2025 (conducted by NTA) desirous of taking admission in NEIAH under the North East State Quota are required to apply directly to the Institute as nominations or recommendations from the State Government will not be accepted.

Institute contact No - 0364-2538134 & Email : dir-neiah@nic.in/neiahshillong@gmail.com. Website: www.neiah.nic.in

(Er. VIPULHOU LHOUNGU)
 Director

US-i ozü linük ya nuclear weapon state ka ama agizüktsüla: N.Korea

Pyongyang, Chiteni/July 29 (Agencies): North Korea lenir Kim Jong Un tenu-i United States dang North Korea ya 'nuclear weapons state' ka ta agizüktsü ayongzük aser jembishinüba ajanga kodanga denuclearisation masütsü ta ashi.

North Korea sorkar meyong Korean Central News Agency ajanga Mongulbarnü sangdong ka agütsüba nung, tarutsü nung kechiserna ajak nung Pyongyang tashi aser geopolitical environment khenyongi melenogo ta agizüktsü ya tongtipang, ta Kim Yo Jong-i ashi.

DPRK nübur ajungai mulungba ama supreme law ajanga melaba aser tashi tulu nuclear deterrent aliba yong amenoka akaba DPRK ya nuclear weapons state ta agizüktsü memulungba khenyongi magizüktsü, ta Kim-i North Korea indang official tenüng Democratic People's Republic of Korea amshia ashi.

"Tang aliba linük jenjang kumzüka ayutsü asoshi DPRK lenmang ajak lapoka lir."

Kim Yo Jung yagi ruling Workers' Party of Korea indang propaganda operations ketdang asür aser lai raratepba nung US aser North Korea majangzüktsü aser Washington-i tebilemba tasen nung tongteprateptsü lenmang bushitsüla, ta ashi.

Teti aser US Tir Donald Trump tsüngta tesendaktep junga liasü aser denuclearisation atema tena tsüngta tesendaktep amshitsü merangra, ajibo menütsür ama züngshitsü, ta Kim-i ashi.

"US-i asangsang temelenshi magizüki aser tesüiba mapang

tamakok alur aliba nung nungshira, DPRK-US senden ya US asoshi teimla ka dang alitsü," ta lai ashi.

North Korea nung khenyongi nuclear nok-nü malitsü asoshi Kim Jong Un den jembishinü akatsü Trump-i mulunga lir, ta hopta tatemlen South Korea indang Yonhap News Agency dang White House ketdangsür kati ashiba sülen Kim-i iba sangdong ya agütsü.

Korea linük ana arütsülen propaganda broadcasts anena Pyongyang den tesendaktep yanglushitsü South Korea Tir Lee Jae-myung-i merangba lai

magizük yutsür anogo ka lir lai iba sangdong ya agütsü.

Kim Jong Un den 2018 aser 2019 nung asemen ajurutepe senden amensang, Trump, January ita White House-i tanaben meyipa shilangba sülen Pyongyang den maneni jembishinü akatsü jangra aliba aiben lemsatepa liasü.

Singapore senden ya US tir teinyakdak aser North Korea lenir tsüngta mezüng ajurutepe liasü, aser iba sülen Trump aser Kim tsüngta Vietnam aser Korea linük ana arütsü nung ajurutepe senden menaka Pyongyang nuclear nok-nü yangluba sentong soita meyetet.

Beijing region nung tzümetsüng aser alinen agi nisung 38 asü



Beijing, Chiteni/July 29 (Agencies): China yimtiba nung küm ka junga arutsü tzünglu aruba ajanga tzümetsüng adoka alinen anenba nung gari pongzüker ao, nisung aika pei ki yutsür ainshi aser power raksaja Mongulbar tashinung nisung 38 asü aser tekumzükba aser teyari agütsüba mapa maneni inyaker.

Mongulbar nikongdang tashi Beijing shilem kar, Hebei province aser anasa Tianjin yimti nung tzümetsüng adoktsü jenjang nung lir.

State media ajanga video prokshiba nung yimdak-

yimtsüngtem nung ki telungi tzü yimoka aitba aser rescuers temi yirur aliba nisung anir aoba aser lenmang raksar alidak nisung bushiba nguogo.

China Ato Kilonser Li Qiang-i ashiba agi, tzünglu kanga sashia aruba aser tzümetsüng agi Beijing nung Miyun district nung tesashiba kongshia nisung aika asü aser tekumzükba maparen tali inyaktüsü ayongzük, ta Xinhua News Agency ajanga ashi.

Tesüiba anogo pezü tsüngta tzünglu 54.3 centimeters (21.4 inches) aru, kong küm shia tzünglu 60 centimeters (23.6

inches) arur ta ashir.

Yipru ajanga Beijing nung yimtsüng 130 dak tema power raksatsü, communication lines raksatsü aser lenmang shilem 30 dak tema raksatsü. Beijing nung ayatirm tashinung tzünglu average nung 16 centimeters (6 inches) dak tema tsük aser Miyun nung aliba jila ana nung tzünglu 54 centimeters (21 inches) aru.

Tzümetsüng tesashi adokba ajanga Miyun nung gari tem pongzüker ao aser power poles tem laodaktsü, koba Hebi indang Luanping county den arütsüa lir. Miyun nung nisung 17,000

densema Beijing nung nisung 80,000 dak tema tesem balalai anir ao, ta Beijing city sangdong ka nung ashi.

Yimti sorkar ajanga ashiba agi, Hombarnü Miyun nung nisung 28 asü aser Yanqing district nung ana asü.

Iba province nung aliba Luanping county yimtsünglen alinen ka aluba sülen nisung ti samaogo ta ashiba sülen Hebei province nung nisung pezü sür aliba Mongulbarnü ngutet. Parnok rongnung nisung pezü tasüman Hombarnü nguteta liasü.

Kasa region nung Mongulbarnü alinen tali alu ta emergency rescue teams ajanga shir, saka nisung asü-amaba osangbo mali.

Central Beijing nungi northeast tsütsü kilometres 100 (60 miles) shi pilar Taishitun jila nung süngdong tera makepa liasü, kong yimtung tzü agi mubanger ki jara nung molushi nüshia liasü.

BWF rankings: Satwik-Chirag top-10-i iogo



Chiteni/July 29, 2025

(Agencies): Mongolbrnü sayaba BWF men's doubles rankings nung India nunger tarep Satwiksairaj Rankireddy aser Chirag Shetty na jenjang asem tejakdangi tua maneni top 10-i iogo. China Open nung semifinal tonga asayaba sülen tenati tang iba jenjang ajangzüktetogo, aser kasa mapang nung India nunger tanga asayartema rankings nung jenjang melenshiogo.

Taoba mapang world number 1 tarep ya China Open nung semifinal tonga asaya saka tena Malaysia nunger tarep Aaron Chia aser

Soh Wooi Yik nati 13-21, 17-21 agi tsükdakja liasü. Iba asayamung densema tena taküm tasembenbuba BWF Tour nung semifinal tonga asayaogo. Satwik aser Chirag na taküm Singapore Open aser India Open nunga semifinal tonga asayaogo.

Taoba küm Thailand Open akokba sülen tena ya world number 1 tarep küma liasü.

Tebur kija asaya nung Lakshya Sen-a jenjang ana tejakdangi tua tang 17buba nung lir. Pai point 54,442 nguteta China nunger asayar Zhenxiang Wang tera agi ajatetogo. HS Prannoy-ia point 40,336 ngua jenjang

ana tejakdangi tuogo aser pa tang world number 33 kümogo.

Kasa mapang nung tetsür kija asaya nung lanur asayar Unnati Hooda jenjang pezü tejakdangi tua tang 31buba tongtetogo, koba la indang career nung tang tashi nung rankings tajungtiba lir. Arishi küm 17 tain asayar yagi China Open pre-quarterfinals nung külem India tsür Sindhu 21-16, 19-21, 21-13 agi koka liasü. Tena tsüngda ghonda ka ser minute 13 asaya liasü. Ajisiüaka la quarterfinal nung Japan tsür Akane Yamaguchi-i tsükdaktsü.

PV Sindhu maneni jenjang 15buba nung lir aser la India tsürtem rongnung ajak dang temaba jenjang nung lir.

Tetsür tarep asaya nung India tsürtem rongnungi temaba jenjang nung aliba tarep Treasa Jolly aser Gayatri Gopichand na 11buba nung lir aser Tanisha Crasto aser Ashwini Ponnappa na jenjang ana tejakdangi tua tang 45buba nung lir.

AFC WOMEN'S ASIAN CUP

India team Group A nung ata lir

Chiteni/July 29, 2025 (Agencies): Australia nung asayatsü aliba AFC Women's Asian Cup atema India tetsür football team Group A nung Japan, Vietnam aser Chinese Taipei den ata lir.

Tanga tanungba telok ana nung hosts Australia, South Korea, Iran aser Philippines den ata lir aser defending champions China team Group C nung North Korea, Bangladesh aser Uzbekistan den ata lir.

AFC Women's Asian Cup Australia 2026 ya March 1 nungi 21 tashi asayatsü. Asayamung ya Sydney, Perth, aser Gold Coast nung asayatsü, kong 2023 kübok FIFA Women's World Cup ayongzüka asayaba stadium tem densema lir. 2006 küm sülen tang mezüngbuba Australia nung iba asayamung ayongzüka asayatsü lir.

Telok asemprongla nungi temaba jenjang nung tembangba team ana aser tasembuba nung tembangba team tajungtiba ana quarter-finals-i aitsü. Quarter-final akokba team pezü FIFA Women's World Cup Brazil 2027 atema qualify asütsü. Quarter-final nung tamakok

angurtem World Cup atema AFC nem lezmüksüba direct spot tanungba ana atema asayatsü. Play-off nung tamakok anguba team ana inter-confederation play-offs ajanga Brazil nung asayatsü asoshi maongka angutsü.

Taoba AFC Women's Asian Cup nung China PR, Korea Republic, aser Japan nunger temaba jenjang nung tembangba team asem ama aser Australia host ama taruba küm asayamung atema qualify süogo. Tanungba team ti ya AFC Women's Asian Cup Australia 2026 Qualifiers ajanga qualify süa liasü. Qualifier ya telok ti küma lemsar June 23 nungi July 19 tashi asaya liasü. Iba asayamung atema qualify asüba team tem rongnung Bangladesh, Chinese Taipei, DPR Korea, India, Islamic Republic of Iran, Philippines, Uzbekistan, aser Vietnam densema lir.

GROUP A - Australia, South Korea, Iran, Philippines
GROUP B - North Korea, China, Bangladesh, Uzbekistan
GROUP C - Japan, Vietnam, India, Chinese Taipei

K Yimso-i SDFA jersey sayatsüogo



Dimapur, Chiteni/July 29 (TYO): Taruba Dr. T Ao asayamung atema Shamator District Football Association (SDFA) team indang Jersey July 27 nü YBBA Guest House, Old Showuba Village, Niuland nung sayatsüogo.

Iba jersey ya Nagaland Building Other Construction Workers' Welfare Board (NBOCWWB) mendenbuba K. Yimso Yimchunger-i sayaja liasü.

Jersey sayaba sentong nung o jembiba mapang Yimso Yimchunger-i, asayartem dang yimayimpong aziüoka alitsü aser masepshitsü ajungshiba den tamasa Tsüngrem meteta alitsü, shibai asenok temaba jenjangi anitsü ta ashi.

Team jersey ya Showuba

Village Baptist Church pastor Rev. Tochumong-i bendanga agüja sarasademja liasü.

Sentong nung SDFA tir Shahoto Yimchunger-i, K. Yimso Yimchunger dang pai mapang agütsüba aser teyari agütsüba atema kanga pelaba lemsatepba den Jersey sponsor asüba atema DANYIM enterprise dang kanga pelaba lemsatepa liasü. Paisa, Music Planet & A-Sport aser HK Rhetso Tyre MRF Kohima nunger danga parnok teyari asoshi kanga pelaba lemsatepa liasü. Taruba Dr. T Ao asayamung nung Shamator District Football Association (SDFA) team ya Team Manager, Tsuyihba aser Coach, Visa Angami nati anir asayatsü.

Chiteni/July 29, 2025

(Agencies): FC Bayern Munich-i goalkeeper Sven Ulreich den ano küm ka atema tenangzüktepba yanglushiogo aser pa club nungi 2026 küm tashi asayatsü.

Arishi küm 36 tain goalkeeper ya 2015 küm VfB Stuttgart nungi Munich-i ao. Pa Stuttgart nungi 222 ben asaya liasü. Pa Bayern nung Manuel Neuer sülen tanabuba goal keeper ang lir, saka pa iba club nungi kanga takok ngua asaya arudar.

Ulreich-i tanabuba jenjang ya pa indang kümdakja team asayar ka ama club tenzüka aruogo. Pa club nungi asayatsü asoshi 2017-28 season nung maongka tajungba ngua liasü. Iba season Neuer yiruba ajanga pa asayatsü maongka ngua liasü. 2017-28 season nung nung Ulreich Bundesliga asaya 29 nung asaya aser iba mapang asaya 12 goal ka danga midaktsüi asaya aser Bayern-i season trokbuba atonga 'The Meisterachale' akokba nung teyari agüja liasü.

2020 küm pa season ka atema Hamburger SV-i ao



aser iba sülen maneni Bayern-isa meyipa arua liasü.

Ulreich-i tang tashi nung FC Bayern nungi asaya 103 nung asayar lir. Pai Bundesliga tekü, DFB Cup asem, DFL Supercup trok aser Champions League aser UEFA Super Cup na khen koker lir.

Bayern-i tawa goalkeeper Daniel Peretz aser Alexander Nubel na loan nung yokogo

aser Neuer maneni nümber 1 keeper lir aser Jonas Urbig tanabuba keeper ama ayutsü imlar. Ulreich ya club nung third-choice goalkeeper asütsü.

Ulreich ya asaya nungi anener club nung tanga shilem ka agitsü ta sangdonger liasü saka tang pa maneni ano club nungi küm ka asayatsü atema tenangzüktepba yangluogo.

BILEMDANGANG

"Ali rongsen ajak liaka anema melira ajak amajok."